

# TUSI TAIALA

---

**MO LE PULEA MA LE VA'AIA LELEI O I'A  
MA FIGOTA**

---

**O LE AFIO'AGA O**

**Tauao'o-Faleasi'u**  
**15 Me 1996**

**SAUNIA:**

Pule mamalu a Alii ma Faipule ma tagatanuu o le Afioga o Tauao'o-Faleasiu ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

# FAASOLOGA

|   | Itulau     |
|---|------------|
| <b>Faalupega</b>  | <b>3.</b>  |
| <b>1 Upu Tomua</b>  | <b>4.</b>  |
| <b>2 Autu</b>   | <b>4.</b>  |
| <b>3 Faamatalaga e uiga i le Afioga</b>   | <b>4.</b>  |
| <b>4 Ituaiga Faigafaiva Taatele</b>   | <b>4.</b>  |
| <b>5 Tulafono a le Afioga e fesootai ma le siosiomaga o le gataifale o Salesatele</b>                                   | <b>5.</b>  |
| <b>6 Tapenaga o lenei Tusi Taiala</b>   | <b>5.</b>  |
| 6.1. Feiloaiga Muamua   | <b>5.</b>  |
| 6.2. Faatalatalanoaga i Vaega e Tolu  | <b>5.</b>  |
| 6.3. Komiti Faufautua o le Faasao   | <b>5.</b>  |
| 6.4. Pasiaina o le Tusi Taiala  | <b>6.</b>  |
| 6.5. Filifiliga o le Komiti o le Faasao   | <b>6.</b>  |
| <b>7 Fuafuaga Faataatitia</b>   | <b>6.</b>  |
| 7.1. Tulafono faa-le-nuu e faasaina fanai'a, ava-niukini ma vailaau oona.   | <b>7.</b>  |
| 7.2. Faasaina le fagotaina o fugafuga, mama'o, maisu ma isi figota o lenei ituaiga mo le faatauina atu mo maketi i fafo | <b>7.</b>  |
| 7.3. Faasaina faigafaiva mai isi afioga   | <b>8.</b>  |
| 7.4. Faasalalauina Tulafono a le Afioga   | <b>8.</b>  |
| 7.5. Faasaina le Faaaogaina o Upega ma Tili Mataninii   | <b>9.</b>  |
| 7.6. Ia aoina mai uta alamea ma faatamaia ai  | <b>9.</b>  |
| 7.7. Faasa ona toe fagotaina mai I'a ma Figota Laiti  | <b>10.</b> |
| 7.8. Ogasami Faasaoina o I'a ma Figota  | <b>10.</b> |
| 7.9. Ia unaia faigafaiva i Tuaau ma aoaoga mo faigafaiva  | <b>11.</b> |
| 7.10. Tufaina atu ma le faatoagaina o i'a ma figota   | <b>12.</b> |
| <b>8 Talosaga a le Afioga</b>   | <b>12.</b> |
| <b>9 Maliliega</b>  | <b>12.</b> |
| <b>10 Toe Iloiloina o le Taiala</b>   | <b>12.</b> |
| <b>11 Upu Mulimuli</b>  | <b>12.</b> |



# **FA'ALUPEGA O TAUAO'O FALEASIU**

**Afio o le Aiga o Mavaega, Paia i le Aiga  
Taulagi ma Alo o Tama a le Aiga.**

**Tama a le Aitu ma le Maugafa ma le Paia i  
le Faletolu ma le Fuaifale.**

## 1. UPU TOMUA

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i afioaga ma alalafaga i tua. I le tele o afioaga, latou te le o faatauaina le vaaia lelei o le tamaoiga ma le siosiomaga o le gataifale. O le faia ma le faaaogaina o ituaiga faigafaiva faa-onapo-nei e i ai mea manava, upega ma tili mataninii, ma vailaau oona e faamata faigofie ai ma tele i'a maua ae o loo faatamaia ai le siosiomaga o le gataifale ma ona tamaoiga. O le faatinoina foi o atinae i luga o le gataifale ua faaleagaina ai le tele o nofoaga ma le miliona o meaola o le gataifale.

O le polokalame o le faasaoina o le gataifale na amata mai e le Ofisa o Faigafaiva i le tausaga 1995. O le faamoemoe o le polokalame ina ia toe tapu'e mai le tamaoiga o le gataifale ma puipua ai le siosiomaga. O taualumaga o le polokalame e aofia ai le soalaupuleina ma le fausiaina o se Tusi Taiala. O lenei Tusi Taiala o loo tamauina ai fuafuaga faataatitia a le Afioaga ma le Ofisa o Faigafaiva. O nei fuafuaga faataatitia e unaia ai le pulea lelei ma fuafua tatau o le faaaogaina o le tamaoiga o le gataifale o Tauaoo-Faleasiu.

## 2. AUTU

O le autu lenei sa faatalalanoaina ma malilie autasi i ai vaega taitasi o le afioaga;

- **Ina ia pulea ma puipua le siosiomaga o le gataifale ma,**
- **Toe faatupulaia le tamaoiga o le gataifale mo tupulaga o le lumana'i**

## 3. FAAMATALAGA E UIGA I LE AFIOAGA

O le afioaga o Tauaoo-Faleasiu e i le itu i saute i sasa'e o le motu o Upolu. O lona faitauaofai e i le va o le 3,300 – 3,700 tagata e aofia ai matai, tina ma tamaitai, aumaga faapea alo ma fanau laiti. E le aofia ai i latou ua faimalaga atu i atunuu i fafo e i ai Niusila, Ausetalia ma le Iunaite Setete o Amerika.

O Tauaoo-Faleasiu e i ai lona a'au e mai lava i le itu i sasae se ia paia le itu i sisifo i le umi e pe a ma le 300 mita. O le umi o le a'au e pe a ma le 250 mita mai le matafaga. O le vaega pito loloto o le aloalo e tusa ma le 2.5 mita i taimi e sua ai le tai, ae 1 mita nisi o vaega o le gataifale pea oo ina pe le tai.

O lenei afioaga e mamalu tele ona pulega aua e puleaina e le Fono a Alii ma Faipule o le afioaga. O le aumaga e lava saunia i taimi uma aua le tautuaina o matai, o tina latou te avatua fautuaga lelei mo ni mataupu tau lotoifale o le afioaga.

## 4. ITUAIGA FAIGAFIIVA TAATELE

E tele ituaiga faigafaiva e mafai ona faatinoina i le aloalo o le afioaga. O nisi o nei ituaiga faigafaiva e i ai le faaaogaina o matatao poo tao fagota i lama poo mata tautā, uaua malau (toso), uaua atule, ma le faaaogaina o upega (e tele ina faatinoina e alii) mo le fofoga taumafa o aiga pe faatau fo'i. O tuiga sea, fao tuitui ma vaga, aoina ma le eliina o figota i luga o le auu o le galuega patino lava lea a tina ma le fanau mo taumafa a le aiga.

O le faatinoina o faigafaiva-le-talafeagai e i ai fanai'a ma ava-niu-kini ua matua faasaina lava i lalo o le pulega mamalu a Alii ma Faipule. E tutusa lelei lava ma le faaaogaina o tane mauulu ma mea manava (scuba gears) i fagotaga ua matua faasaina lava ona toe faatinoina i gataifale o le afioaga.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo ma pau'ulu, poge ma alogo, ume ma filoa, faapea ma le palolo sa tele ma faigofie ona maua i le 30 tausaga talu ai. E oo foi i figota e i ai le sisi, faisua, vaga, tuitui faapea sea, loli, mamaō ma fugafuga sa tele i aso ua mavae. I le taimi nei, o nei i'a ma figota ua pa'ū maualalo le faitau aofai ma e tele ni itula e faaaluina mo fagotaga faato'ā maua se meaai mo le aiga, pe'a faatusatusa i le 30 tausaga ua mavae.

## **5. TULAFONO FAA-LE-NUU E FESOOTAI MA LE SIOSIOMAGA O LE GATAIFALE O TAUAO'O-FALEASIU**

O Tauao'o Faleasiu e i ai ona tulafono i aso ua mavae e faasaina ai faigafaiva-le-talafeagai e pei o fanaia, ava-niu-kini, vailaau oona, lama moli-uila ma tane mauulu (scuba gears) ua matua faasaina ona toe vaaia.

Ua faasaina foi tagata mai isi afioaga ona toe fagotaina gataifale o Tauao'o-Faleasiu. E ui lava ina ua i ai tulafono e pei ona taua, ae le o atoatoa lona faatinoina ma lona va'aia ona o le lē aloaia e le 'au faifaiva mai isi afioaga. O le isi itu o le mamao lea i tai o nofoaga o loo faatinoina ai nei ituaiga o faigafaiva atoa ai ma auala o loo faaogaina.

## **6. TAPENAGA O LENEI TUSI TAIALA**

O lenei tapenaga sa saunia lava e le Fono a Alii ma Faipule ma tagatanuu o Tauao'o-Faleasiu faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se oototoga lenei i le tapenaga o lenei Tusi Taiala ina ua maea ni fonotaga sa faia ua taua i lalo.

### **6.1 Feiloaiga Muamua ma le Afioaga.**

I le amataga mai o le polokalame, sa faapea ona faato'ai mai se finagalo o le Pule Mamalu a Alii ma Faipule e taua mai i le Tofi Pulenuu i le Ofisa o Faigafaiva e faailoa ai lo latou fiafia e auai i le Polokalame mo le Puipuiga o Gataifale. O le 05 Fepuari 1996 sa faia ai se feiloaiga muamua (fono) a le Ofisa ma le Afioaga e faamalamalama ai le polokalame pe taliaina e le afioaga. O le fono fo'i lena sa auai ai le Faatonu Lagolago, Alii ma tamaitai Ofisa e taliaina aloaia ai se finagalo o le afioaga i le polokalame. O le maea o lenei feiloaiga muamua ma taliaina lelei ai e le afioaga le polokalame, ma filifili ai loa le Aso Gafua 10 Tesema 2007 mo faatalatalanoaga ma vaega e tolu o le afioaga e aofia ai Alii ma Faipule, Komiti a Tina ma Tamaitai faapea Tupua ma le Aumaga.

### **6.2 Faatalatalanoaga i Vaega e Tolu.**

O le taua o lenei faatalatalanoaga ina ia vaevaeina le afioaga i vaega e iai matai, tina ma aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo alia'e mai i le siosiomaga o le gataifale o Tauao'o. Sa faapea foi ona sailia ai ma ni aafiaga ma ni mafuaaga o nei faafitauli. O ni fofo, faatinoga ma i latou e faatinoina nei fofo sa faailoa mai. O lenei faatalatalanoaga sa faia i le aso 10 Tesema 2007.

### **6.3 Komiti Faufautua o le Faasao:**

O le Komiti Faufautua sa filifilia ai sui e ta'i tolu mai i vaega o matai, tina ma aumaga. O le matafaioi a le Komiti Faufautua o le tuu-faatasia lea o faamaumauga ma faamatalaga sa aoaoina mai i taimi o faatalatalanoaga (consultations) e pei ona tāua i luga. O nei faamatalaga sa mafai ai ona latou tapenaina se ata faataitai o le Tusi Taiala.

## **6.4 Pasiaina o le Tusi Taiala.**

O lenei Tusi Taiala sa tuuina aloaia i le fono a Matai e sui o le Komiti Faufautua ma sui o le Ofisa o Faigafaiva mo le pasiaina ma amata faatino ai loa galuega ma matafaioi a vaega taitasi.

O le fono foi lea e filifilia ai loa ma le 'Komiti o le Faasao' e taitaia le faagaloiga o fuafuaga ua uma ona fa'ata'atitia. O le faagasologa atoa o nei fuafuaga fa'atitia a le afioaga e aofia ai foi ma fuafuaga fa'ata'atitia e lagolagosua mai ai le Ofisa o Faigafaiva.

## **6.5 Filifilia o le Komiti o le Faasao**

O le Komiti o le Faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. I le pasiaina ai o le Tusi Taiala, e fesootai lava pea le Ofisa ma le Komiti i tulaga uma lava e manaomia ai le fesoasoani e pei ona autasi ma tamauina i le Taiala.

## **7. FUAFUAGA FAATAATITIA**

O fuafuaga fa'ata'atitia o ni galoiga ua faamoemoe e faaono foia ai faafitauli ua faaalua ma faailoa mai e vaega eseese o le afioaga. E lua ituaiga o fuafuaga, ma o le fuafuaga ua aupito sili ona tūa o fuafuaga faataatitia a le Afioaga.

I le isi itu o fuafuaga faataatitia a le Ofisa o Faigafaiva ma o nei fuafuaga o le tuuina atu o fautuaga ma fesoasoani i nisi auala e pei o aoga ma le tufatufaina o pepa o faamatalaga i mataupu e fesootai i le gataifale.

O galuega uma lava e faatinoina e le Ofisa o Faigafaiva e ao ona faamaonia e le Faatonu Lagolago (Assistant Chief Executive Officer) a le Matagaluega o Faatoaga ma Faigafaiva.

I taimi o faatalatalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga o le faaititia lea o i'a ma figota i le aloalo ma aau o le afioaga o Tauao'o. O mafuaaga ma o latou aafiaga i le siosiomaga o le gataifale sa faapea ona iloilo ma sailia. O tali o faafitauli ma fofo poo auala e foia ai na iloilo foia i faatalatalanoaga. E le gata i lea sa faailoa mai ai foi ma vaega latou te faatinoina nei galuega.

O le pusa i lalo o loo faailoa atu ai tulafono a le Malo o Samoa (National Laws) e faasino i le pulea tatau ma le fa'aaoga gafataulimaina o punaoa faalenatura ma alāmanuia o le gataifale ma le siosiomaga.

### **Tulafono Autu Tau Faigafaiva (1988) : Fisheries Act (1988)**

- (1) Faasaina o Faigafaiva-le-Talafeagai,
- (2) Faamalosia ai le Laiseneina o Vaa-Fagota.

### **Tulafono Faatonutonu Mo Le Laiti Faatapulaaina mo I'a ma Figota (1995) : Size Limit Regulations (1995)**

O le tulafono lea e faatapulaaina ai le laiti o i'a ma figota e faatagaina ona fagotaina faapea mataupega e faatagaina.

### **Tulafono Faatonutonu mo le Faaogaina o Faguea ma isi Mea Manava (2003) : Scuba Diving Regulations (2003)**

O faguea ma isi mea manava e faasaina ona faaogaina mo fagotaga seia vagana ai mo suesuega faa saienisi pe mo le faaogaina e matamata ai i le siosiomaga ma le matagofie o le sami.

### **Tulafono Laiti o Faigafaiva: Fisheries Bylaws**

O tulafono a le nuu ma afioaga ua amanaiaina e le Faamasinoga.

O le vaega i lalo o le a auiliiliina atu ai atoatoa fuafuaga fa'ata'atitia sa aoina mai i vaega taitasi ma tuufaatasia e le komiti faufautua ma le lagolagosua a le Ofisa o Faigafaiva.

## **7.1 IA FAASAINA FAIGAFAlVA LE TALAFEAGAI E IAI FANAIA, AVA NIU KINI, MA VAILAAU OONA.**

### **OTOOTOGA**

Na faaalua e vaega taitasi i taimi o faatalatalanoaga o loo faaauauina pea le faaaogaina e faifaiva o ava niu kini ma vailaaau oona i fagotaga, ui lava ina le'o toe vaaia ni fanai'a. O nei faigafaiva le talafeagai ua mautinoa lo latou tulaga ogaoga i le faatamaiaina o le siosiomaga o le gataifale, e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auuala faa-faigafaiva e umi ma tele se taimi e toe faafoi ai i le lelei sa i ai muamua.

### **FUAFUAGA FAATAATITIA A LE AFIOAGA**

Talu ai ona o le tulaga pagatia ua iai le gataifale o lenei nuu o Tauao'o o lea na a'e ai se finagalo autasi i le Fono ma le komiti faufautua ina ia matua faamalosia tulafono a le afioaga e faasaina ai faigafaiva-le-talafeagai e pei o fanai'a, ava-niu-kini ma vailaaau oona. O le puipuiga ma le faamamaluina o nei tulafono o le a i aao lava o le pule mamalu a ali'i ma faipule faatasi ai ma le lagolagosua a tagata-nuu o le afioaga.

### **FAUTUAGA**

Ia toe fa'amalosia ma fa'amamaluina tulafono ua taua i lalo a le afio'aga mo le fa'asaina o faigafaiva le talafeagai.

### **TULAFONO**

Ua matua faasaina lava soo se tagata ona faatinoina ni faigafaiva le talafeagai e iai fanai'a, ava niu kini ma vailaaau oona (clorox) poo se isi lava faiva matautia i gataifale o lenei nuu o Tauao'o.

### **FAASALAGA**

(a) O tagatanuu o le afioaga o le a ua solia ma le tausisia lenei tulafono, ua noatia i se sala tupe e **\$400.00** po'o le **5 pusaapa** ua faaeina atu e le Fono a Alii ma Faipule.

(e) O tagata mai isi afioaga o ia lea ua solia lenei tulafono o le a molia i le **Tulafono Autu o Faigafaiva 1988**.

### **FUAFUAGA FAATAATITIA A LE OFISA**

O le a fesoasoani le ofisa i le tufatufaina o pepa o faamatalaga i faigafaiva-le-talafeagai aemaise ai o le faatinoina lea o suesuega ma moliaga o tagata ua faamaonia lona faatinoina o nei faigafaiva i le faamasinoga a le Malo o Samoa.

## **7.2 IA FAASAINA LE FAGOTAINA O FUGAFUGA, MAMA'O, MAISU MA ISI FIGOTA O LENEI ITUAIGA MO LE FAATAUINA ATU MO MAKETI I FAFO.**

### **Otootoga**

O figota e pei o fugafuga, mama'o, sea ma isiituaiga o loo faatauina mo le fofoga taumafa o tagata Samoa. O nei figota e faigofei ona fagotaina ona e maua i nofoaga papa'u. Talu ai o le faigofie ona fagotaina o nei figota ua i ai se popolega e faaono tulai mai ai le faaitiitia o nei tamaoiga i se taimi o le lumanai pe a faaauau pea ona fagoaina mo le auina atu i maketi i fafo. O le aua moomia tele ai ni tulafono e ao ona puipuia ai le soona fagotaina o nei figota.

**Fuafuaga Faataatitia a le Afioga**

O le fagotaina o fugafuga, mama’o maisu ma isi ituaiga mo maketi i atunuu i fafo ua mafua ai le tulaga faaitiitia o le mauaina o nei figota i gataifale o Tauao’o. Ua fautuaina e le Komiti Fauautua mo le Vaaia Lelei o I’a ma Figota fautuaga nei.

**Tulafono**

Ua matua faasaina soo se tagata mai isi afioga ona toe soona fagotaina fugafuga, mama’o ma sea ia tau lava o tagata o le afioga e fagotaina nei figota aua le fofoga taumafa.

**Faasalaga**

(a)O le a tagatagai lava le mamalu o le pulega a Alii ma Faipule, ma fuafua

**7.3 IA FAASAINA FAIGAFAlVA MAI ISI AFIOAGA****OTOOTOGA**

Ua maitauina le toatele o tagata mai isi afioga ua latou fagotaina gataifale o le afioga o Tauao’o. Ua le gata i lea, ua latou faatamaia foi le gataifale i ni auala le talafeagai ma ua utiuti ai le tamaoiga e maua mai le aloalo o lo o faalagolago iai le afioga.

**FUAFUAGA FAATAATITIA A LE AFIOAGA**

Ua i ai se fuafuaga a le afioga o le a faia se tulafono e faasaina ai tagata mai isi afioga ona fagotaina o latou gataifale.

**TULAFONO**

Ua matua faasaina lava faigafaiva mai isi afioga ona toe fagotaina gataifale o lenei nuu e aunoa ma se maliliega autasi mai le Fono a Alii ma Faipule.

**FAASALAGA**

O tagata mai isi afioga o ia lea ua solia lenei tulafono o le a molia i le **Tulafono Laititi o Faigafaiva**.

**FUAFUAGA FAATAATITITA A LE OFISA**

O le a lagolagosua le Ofisa o Faigafaiva i le suesueuina ma le faatinoina o moliaga o lē ua solitulafono i le faamasinoga a le Malo.

**7.4 IA FAASALALAUINA TULAFONO A LE AFIOAGA****Otootoga**

Na fautuaina e le komiti Fauautua mo le Vaaia ma le Pulea tatau o i’a ma figota o le Gataifale le faasalalauina o tulafono a le nuu ua faamoemoe ma faaagaga i le pupuiga o le siosiomaga o le gataifale ma ona tamaoiga ma faigafaiva.

**Fautuaga**

O faasalalauiga i leitio o le a gafa le ama Alii ma Faipule. O le Komiti Fauautua mo le Vaaia Lelei o I’a ma Figota o le a gafa lea ma le faamaopopoina aemaise le tapenaga o faasalalauiga e faatatau i tulafono e puipuia ai le siosiomaga o le gataifale ma le vaaia lelei o i’a ma figota.

Autu o le Faasalaga : **Puipuiga o le Gataifale Tauao’o-Faleasiu.**



### **Taimi Fautuaina**

O faasalalauga uma e ao ona faamaopoopoina pe a maea ona faamaonia uma tulafono ua faatatauina ma faagaga i pulega o le siosiomaga o le gataifale ma le vaaia lelei o i'a ma figota.

## **7.5 IA FAASAINA LE FAAOGAINA O UPEGA MA TILI MATANINII**

### **OTOOTOGA**

O le faaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua pe'a faaauuina pea nei ituaiga faigafaiva. O le a oo ina faaitiitia i'a ma figota e mafai ona oo atu lo latou lapopoa e maua ai le avanoa e fanafanau ma tautuufua ai.

### **FUAFUAGA FAATAATITIA A LE AFIOAGA**

Ua faailoa mai e le komiti o le faaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaogaina i fagotaga i le gataifale o le afioaga. Ua faapea foi ona faaalai mai e le afioaga lo latou matua lagolagoina o le Tulafono Faatonutonu o Faigafaiva a le Malo ua i ai nei mo le faatapulaaina o mataupega ma tili.

### **TULAFONO**

(a) Ua matua faasaina lava ona toe faaogaina upega e i lalo ifo o le **2.0" inisi (50 mm)** lona mataupega faapea foi ma tili ia le i lalo ifo o le **1.2" inisi (30 mm)** i gataifale o Tauao'o.

### **FAASALAGA**

(a) O tagatanuu o le afioaga o ia lea ua solia lenei tulafono, o le a noatia i se faasalaga tupe e **\$400.00** po o le **5 pusaapa** ua faaeina atu e le Fono a Alii ma Faipule.

(e) O tagata mai isi afioaga o ia lea ua solia lenei tulafono, o le a molia i le **Tulafono Faatonutonu o Faigafaiva (1995)** a le Malo o Samoa.

### **FUAFUAGA FAATAATITIA A LE OFISA**

O le'a lagolagosua mai le Ofisa o Faigafaiva e ala i lana polokalame fesoasoani, o le tuuina atu lea o faamatalaga e saga faamautuina ma faamaopoopoina ai lenei tulafono.

## **7.6 IA AOINA MAI UTA ALAMEA MA FAATAMAIA AI**

### **Otootoga**

O le alamea o se meaola o le ituaiga o le aveau ma e nofo i luga o le aau. O lenei meaola e na te aiina meaola ninii ua taua o POLIPE o loo tutupu mai ai amu. A oo ina faateleina le alamea o le a faapena ona latou faatamaiaina se vaega tele o le aau ma aveia ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaa. E le mafai ona faa-umatia le alamea i le vaeveaina o lona tino i le sami aua e mafai e nei itu tino ona faatupuina mai ai nisi alamea fou. E pau le auala e mafai ona tapeina ai lenei meaola o le aoina mai lea i uta i le pau matu e faamagoina ai pe tanuina foi. E mafai ona faaogaina lenei meaola o se faalelei eleele mo faatoaga ma mea toto.

**Fuafuaga faataatitia a le afioaga**

Ua faailoa mai e le afioaga o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta mo le faatamaiaina o lenei meaola faalafua.

**Fautuaga**

Ua fautuaina e le komiti faufautua o le aoina mai i uta o le alamea, o le a faatinoina lava lea e tagatanuu o le afioaga. O le faatinoina o lenei fuafuaga o le a aoina tai-ono masina alamea ma aumai i le pau-matu e faatamaia ai ma faagaina ai mo le faalelei eleele.

**Fuafuaga faataatitia a le ofisa**

E leai se polokalame a le Malo ua fuafuaina e totogi ai le faatamaiaina o le alamea vagana ai ni fautuaga e fesoasoani atu ai le ofisa i auala talafeagai e tineia lenei meaola faalafua e ala atu i Pepa o faamatalaga ua maea ona saunia.

**7.7 IA FAASAINA ONA TOE FAGOTAINA MAI I'A MA FIGOTA LAITI****OTOOTOGA**

O le tele o afioaga ua latou faaalua mai le toatele o faifaiva latou te fagotaina mai i'a ma figota laiti. O le mafuaaga lea ua vave faaititia ai i'a ma figota, ona ua le maua se avanoa e tautuufua ma fanafanau ai nei meaola.

**FUAFUAGA FAATAATITIA A LE AFIOAGA**

Ua i ai le fuafuaga a le afioaga o le a lagolagoina le tulafono o faigafaiva mo le lapopoa faatapulaaina e fagotaina ai i'a ma figota.

**TULAFONO**

Ua matua faasaina lava soo se tagata ona fagotaina mai i'a ma figota laiti o loo faaalua manino i le Tulafono Faatonutonu o Faigafaiva 1995.

**FAASALAGA**

(a) O tagatanuu o le afioaga o le a le usitaia lenei tulafono o le a fuafua lava e le Pule mamalu a Alii ma Faipule le faasalaga mo le ua solitulafono.

(e) O tagata mai isi afioaga o ia lea ua solia lenei tulafono o le a molia i le **Tulafono Faatonutonu o Faigafaiva 1995.**

**FUAFUAGA FAATAATITIA A LE OFISA**

O le a fesoasoani le Ofisa mo le tufatufaina o pepa o faamatalaga i i'a ma figota o loo aafia i lalo o lenei tulafono aemaise ai o siata (charts) poo pepa faailoa (posters) o lenei tulafono taua.

**7.8 OGASAMI FAASAOINA O I'A MA FIGOTA****OTOOTOGA**

Sa faaalua e le afioaga, o le vave faatupulaia o le tamaoaiga ua tataua ona avea se vaega o le gataifale ma vaega faasao, e vave ai ona toe faatupulaia le faitauaofai o i'a ma figota i le gataifale. O lenei vaega faasao o le a faasaoina ai amu, aau faapea foi i'a ma figota ina ia mafai ona maua e nei meaola le avanoa e tautuufua ma fanafanau ai.

O le autu taua lava, o le a avea lenei faasao ma :

- apitaga ma nofoaga e tautuufua ma fananau ai i'a ma figota
- avanoa e toe faaleleia ai le siosiomaga o le gataifale ( amu/aau)
- sulufaiga o isi meaola ma punaoa eseese o le sami
- mataaga mo le afioaga ma e asiasi mai i le afioaga.

O le a fanafanau ma tautuufua i'a ma figota o loo nonofo i le vaega faasaoina ma tafea atu o latou fua fanau ma faatupuina ai, nisi meaola fou i nofoaga ua faaititia ai i'a ma figota. O le a le pine ona manuia ai i tatou ae faapea foi tupulaga o le lumanai.

#### **FUAFUAGA FAATAATITIA A LE AFIOAGA**

O le a filifilia e le afioaga se vaega o le gataifale e faatinoina ai le vaega faasaoina. O le a latou fausiaina foi se tulafono e faasaina ai ni faigafaiva ona faatinoina i lea vaega. O le afioaga foi latou te mata'ituina ma faamalasia tulafono.

#### **Fuafuaga Faataatitia a le Ofisa**

O le a fesoasoani le ofisa i le faatinoina o le iloiloga o le tulaga talafeagai o le gataifale mo se vaega faasaoina. E le gata i lea a o le tuuina atu o fautuaga ma faamatalaga mo le tausiga, pulea ma le vaaia o le vaega faasaoina o le gataifale o le afioaga. E fesoasoani atu foi le ofisa i le tapenaina o tulafono e puipuia ai le vaega faasaoina.

## **7.9 IA UNAIA FAIGAFAlVA I TUAU MA AOAOGA MO FAIGAFAlVA**

### **Otootoga**

E mafai ona faaleleia le tamaoiga o i'a ma figota maua i aloalo, aau ma vaega o le gataifale ua faaleagaina. Pe afai ae faaititia le fagotaina o nei vaega o le gataifale, ia poo le unaia o tulaga tau faigafaiva i tuaau ma aau mamao.

O se tasi o auala e faaleleia ai le tamaoiga o le gataifale, o le fagotaina lea o ogasami o le gataifale e lei fagotaina lava aemaise o tuaau.

Ua i ai le talitonuga i le Komiti Faufautua mo le Vaaia Lelei o i'a ma figota e ao ona unaia ma faamalasia faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ua le gata foi i leae o le a mafai ai ona toe faatupulaia ma faaleleia ai le tamaoiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tuaau o lea ua taumafai ai le Ofisa o Faigafaiva e sailia ni vaa talafeagai mo le faamoemoe.

### **Fuafuaga Faataatitia a le Afioaga**

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le au tautai o se nuu ma ia faatautaia e se Alii Ofisa o Faigafaiva ua i ai se tomai faapitoa tau faigafaiva.

### **Fuafuaga Faataatitia a le Ofisa o Faigafaiva**

O le a iloiloina e le Ofisa o Faigafaiva manaoga tau i auala tau faigafaiva e ao ona fesoasoani ai e aoaoina ai le mamalu o le autautai o le afioaga. O itu taua o le a aafia i nei aoaoga e pei o le teuina ma le vaaia lelei o i'a, saogalemu i luga o le sami, tausiga o afi vaa, faaasuina o i'a, ma isi lava mataupu taua.

### **FAAMATALAGA FAAOPOPO**

#### **Vaa mo fagotaga i tuaau:**

O le leai o ni vaa talafeagai mo fagotaga i tuaau o le ala lea ua avea ma vaegase i le unaia o faigafaiva i tuaau. E leai se vaa fagota e i le va o le alia ma paopao, ma o se vaa i lea va ua talitonuina o le a talafeagai mo faigafaiva i tuaau. I saililiga a le Ofisa o Faigafaiva i se vaa talafeagai, ua filifilia ai le vaa e i le va o le 14ft – 16ft ma o lona tau a ititi ifo o le \$10,000 tala tuufaatasi i ai ma lona afi. O lenei ituaiga vaa e mafai ona faaaauvaaina e ni tagata se toalua pe toatolu foi ma e mafai ona faaaogaina lenei vaa i faigafaiva i tuaau. O le a fesoasoani le Ofisa o Faigafaiva i aiga taitasi i mea tau nonoga tupe aua le faatauina o le vaa ma le afi. O le a faia foi ni aoaoga mo le saogalemu i luga o le sami, teuina ma le vaaia lelei o i'a, tausiga o vaa ato ai ma le faiga o mea fagota.

## **7.10. TUFAINA ATU MA LE FAA-FAATOAGAINA O I'A MA FIGOTA**

O le tufaina atu, ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina o figota i se nofoaga ua saunia.

O le tufaina atu ma faa-faatoagaina, o nisi nei o atinae mo le faatupuina o figota aua le fofoga taumafa o le afioaga. O nei auala faa-atinae e moomia ai lava le galulue filiga ma le faamaoni o le afioaga ina ia ausia se taunuuga lelei.

Sa faaalua mai e vaega taitasi, o nisi o figota sa maua i lo latou gataifale ua tauau ina mou atu. O nisi o nei figota ua masalomia ua le toe maua i le taimi nei. O lea ua latou faatalosagaina ai nisi o figota e faa-f'atoagaina i lo latou gataifale.

### **Fuafuaga faataatitia a le afioaga**

Ua i ai le fuafuaga a le afioaga o le a latou mataituina ma vaaia lelei figota o le a tufaina atu mo le faa-faatoagaina i aloalo aemaise o le mautinoa lelei o lo latou saogalemu mai le faaleagaina.

### **Fuafuaga faataatitia a le ofisa**

O le a fesoasoani le ofisa i le tufaina atu lea o figota e faa-faatoagaina i aloalo ma iloiloina le tulaga talafeagai o le gataifale mo nei figota. O le a saunia foi ni aoaoga e faamalamalamaina ai le olaga faa-natura o nei figota aemaise o le mataituina ma le tausia

## **8. TALOSAGA A LE AFIOAGA**

O nei talosaga sa mafai ona tuuina mai e sui o le afioaga sa auai i fonotaga ma le Ofisa i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti o le Gataifale i le latou fonotaga ma le Ofisa. Pe a talafeagai o nei talosaga o le a mafai ona iloiloina e le Ofisa o Faigafaiva ma faamaonia mai e le Alii Ofisa Sili Lagolago mo le faataunuuna pe a maea pasia ma taliaina e le Fono a Alii ma Faipule lenei Tusi Taiala. O talosaga uma sa tuuina mai o loo faailoa atu i lalo.

- (a) Faatuina o le Faasao o I'a ma Figota
- (e) Faaolaina o Faisua
- (i) Atinae Tilapia
- (o) Isi figota talafeagai

## **9. MALILIEGA**

Ua i ai le maliliega o le a galulue soosoo tauau uma vaega i le puipuiga o le siosiomaga o le gataifale mo le manuia o tagatanuu o le afioaga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i le fuafuaga tatau mo le pulea ma le vaaia lelei o i'a ma figota o le afioaga.

## **10. TOE ILOILOINA O LENEI TAIALA**

### **OTOOTOGA**

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua ma le aoga o lenei polokalame i totonu o alalafaga, aemaise o ni auiliiliga maumaututu i le tulai mai o galuega fai a le afioaga ma le ofisa i le faataunuuina o fuafuaga faataatitia e pei ona taua i luga. O lenei foi iloiloga e lipotia ai le taulaumanuia ma ni fa'aletonu o le polokalame talu ona faavaeina i le afioaga.

### **FUAFUAGA FAATAATITIA A LE AFIOAGA MA LE OFISA**

Ua iai le maliliega a le Komiti faufautua a le afioaga ma le Ofisa o Faigafaiva o le a toe auiliiliina lenei fuafuaga tatau pe a maea le ono (6) masina talu ona asia lenei tusi i le fono mulimuli. O le a toe feutagai ai le komiti ma le ofisa i se aso o le a atofaina pe a atoa le ono (6) masina.

## **11. UPU MULIMULI**

O le auai o le afioaga o Tauao'o-Faleasiu i le polokalame mo le pulea ma le vaaia lelei o i'a ma figota ua mautinoa le manuia o le afioaga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afioaga; i le pule mamalu a alii ma faipule, komiti a tina ma tamaitai, aumaga aemaise o le Malo e tau ala atu le Ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatali ai ni tali faaaliali ma sona lelei, o lea e taua ai mo le silafia e tagatanuu o le afioaga. O i latou o le a talisapaia ma aeae i nei manuia o tupulaga o le lumanai o le afioaga. O lea ua a'e ai se tofa i le afioaga e faia se polokalame faapenei a le malo e fesoasoani ai e toe tapu'e mai le sosia o le tamaoaiga o le gataifale o le afioaga ua tauau ina mou atu.